

## Dialog 1

<i>camarier:</i>	Allegra! Che vess Ella jent?
<i>duonna Rauch:</i>	Allegramaing! Eu n'ha üna said naira. Hmm... Eu vess jent ün'aua minerala cun gas.
<i>camarier:</i>	Va bain ... Trais deciliters o ün mez liter?
<i>duonna Rauch</i>	Ün mez liter, per plaschair.
<i>camarier:</i>	D'accord! E che possa manar a tai?
<i>Fadri</i>	Ün sirup d'ampuas. (e sü per la mamma) Das-cha avair ün toc tuorta da tschiculatta?
<i>duonna Rauch:</i>	Schi, ma be ün pitschen.
<i>camarier:</i>	Stupend, ün pitschen toc tuorta da tschiculatta per tai. Co hast tü nom?
<i>Fadri</i>	Eu n'ha nom Fadri.
<i>camarier:</i>	Che bel nom! Es quai tuot o possa manar amo alch oter?
<i>duonna Rauch:</i>	Na, quai es tuot, grazcha fich!
<i>camarier:</i>	Jent. Ün pitschen mumaint!

## Dialog 2

camariera:	Bun di. Che vessan Els jent?
Gianna:	Nus vain üna fom naira e vessan jent alch da mangiar. Das-chaina avair la carta dals menüs, per plaschair?
camariera:	Natüralmaing! Vessan Els jent alch da baiver ouravant?
Gianna:	Schi ... ün mez liter aua minerala, per plaschair!
camariera:	Cun o sainza gas?
Gianna:	Sainza.
camariera:	Jent ... ed El?
Marc:	Eu vess jent traïs deciliters Coca-Cola.
camariera:	Va bain ... Uschigliö amo alch?
Marc:	Na, grazcha.
Gianna:	Eu neir, grazcha.
camariera:	Stupend, maina güsta la carta! Be ün mumaint.
<b>5 minuts plü tard</b>	
camariera:	Han Els fingià decis?
Gianna:	Schi, eu vess jent il prüm üna pitschna salata verda e davo il tatsch cun chaschöl e mösa da maila.
Marc:	Ed eu vess jent üna schoppa da giuotta e lura ün cordon bleu cun pomfrits. Ils pomfrits sainza sal, per plaschair. Ma cun bler ketschup e majonesa.
camariera:	Perfet. Füss quai tuot?
Gianna:	Esa agl aint illa sosa da salata?
camariera:	Schi, ün zich.
Gianna:	Das-chessa in quel cas avair be ün pa öli ed aschaid?
camariera:	Schi, natüralmaing, ingün problem. Be ün mumaint, eu main güsta ils antepasts.

### Dialog 3

A l'entrada	
camarier:	Buna saira. Ha El reservà üna maisa?
Curdin:	Schi, eu n'ha reservà üna maisa per Tönduri. Nus eschan in trais.
camarier	Ah schi, quia, eu vez. Els pon güsta gnir cun mai, eu Tils accumpogn a Lur maisa.
Curdin:	Stupend, grazcha fich!
<b>A la maisa:</b>	
camarier:	Das-cha fingià manar alch da baiver?
Luisa:	Schi jent, nus vessan jent üna gronda butiglia aua minerala cun gas.
camarier:	Fich jent. Giavüschan Els amo alch oter ouravant? Forsa ün pitschen aperitiv?
Luisa:	Oh schi, jent. Che po El racumandar?
camariera:	Nus vessan ün fich bun vin alb dal Tirol dal Süd.
Gianna:	Hmmmm..., vin nun haja uschè jent. Han Els eir prosecco?
camariera:	Schi, natüralmaing.
Gianna:	Stupend, lura vess eu jent ün magöl prosecco cun ün pa glatsch.
camariera:	Jent, e per Els?
Simona:	Eu pigliess jent ün magöl dal vin alb.
camariera:	Quai es üna buna decisiun. Ella nu s'inrüclarà da Sia tscherna. Ed El, giavüscha'L eir ün aperitiv?
Curdin:	Na grazcha, eu stögl ir amo cul auto.
camariera:	Nus vain eir aperitivs sainza alcohol. O ün excellent sirup da savü da nossa chasa?
Curdin:	Na grazcha fich, eu stun bain uschè pel mumaint.
camariera:	Stupend! Be ün mumaint ...
10 minuts plü tard:	
camarier:	Han Els pudü tscherner?
Luisa:	Na, na amo dal tuot. Po El racumandar üna specialità da la chasa?
camarier:	Eu Tils poss racumandar nossa grigliada cun differentas charns da la regiun e bizoccals. Quist trat füss güsta per trais persunas.

<i>Luisa:</i>	Che maniais? Eu vess cuaida da provar quai!
<i>Curdin:</i>	Eu sun da la partida.
<i>Gianna:</i>	Schi, s'inclegia eir eu. Forsa amo üna pitschna salata ouravant?
<i>camarier:</i>	Nus vessan üna bella rampunella garnida cun ün öv e panzetta.
<i>Luisa, Curdin, Gianna:</i>	<i>Tuots trais conferman:</i> Schi! / Stupend! / Quai es bun! / ...
<i>camarier:</i>	Perfet, eu n'ha notà Lur postazion. Vessan Els jent amo ün pa vin? Nus vain ün fich bun vin cotschen talian chi s'affess bain culla charn. Dessa manar quel vin per insajar?
<i>Gianna:</i>	Schi, jent. Quai tuna bain.
<i>camarier:</i>	Ed amo ün'aua minerala? Cun o sainza gas?
<i>Curdin:</i>	Jent ün liter cun gas. E per mai amo ün magöl Coca-Cola.
<i>camarier:</i>	Jent. Be ün mumaint!

## Dialog 4

<i>camarier:</i>	Chau! Che vessat vus jent?
<i>Curdin:</i>	Nus vessan jent alch dutsch, üna glatscha o ... vais eir tuortas? Nus vain dudi chi detta quia fich buns desserts.
<i>camarier:</i>	Quai fa plaschair da dudir. Nus vain differents desserts: üna tuorta da maila, cornets da tschiculatta ed ün stupend tiramisu. E nus vain üna gronda carta da glatscha. Eu tilla main subit.
<i>Sara:</i>	Eu pigl üna glatscha. E vus?
<i>Flurina</i>	Eir eu.
<i>Jan:</i>	Eu nu sa amo, eu stögl amo stübgiar.
<i>camarier:</i>	Quia es la carta. I dà uschigliö eir amo tuorta da nuschs, quella vaina adüna in nos sortimaint.
<i>Flurina:</i>	Eu pigl ün cup Danemarc cun blera gromma.
<i>Sara:</i>	Per mai duos cullas glatscha, üna da nitschoula ed üna da limun.
<i>camarier:</i>	Im displascha, ma glatscha da limun nu vaina plü. Possa manar ün'otra?
<i>Sara:</i>	Lura piglia amo üna culla glatscha da pistazia. Cun marenga, ma sainza gromma.
<i>Curdin:</i>	Eu pigl ün cornet da tschiculatta ed ün cafè cun lat.
<i>Jan:</i>	Per mai be üna Coca-Cola. Eu insai lura ün zich da tia glatscha. (cun ün surrier sü per Flurina)
<i>Flurina:</i>	( <i>disch cun ün surrier</i> ) Eu nu sa lura, sch'eu part mia glatscha cun tai ...
<i>camarier:</i>	Grazcha fich per las postaziuns! Uschigliö amo alch? Alch da baiver per las giuvnas?
<i>Flurina:</i>	Na, tuot in uorden. Grazcha fich.
<i>camarier:</i>	Be ün mumaint, eu main güsta tuot.